



Pona bandimi nyonso ya Eklezya Néo-Apostolique ya RD Congo Ouest

## CIRCULAIRE 003/APD/2026

Bandeko ya bolingo mibali pe basi kati ya Kristo ,

Boleki ya Ntoma-mokonzi emonani lokola makambo ya kala. Kasi atako bongo, sango ezali nanu koyokana polele pe ya tango oyo tozali : « *Tango nyonso oyo ozali sima ya mobateli ya mpate, Yezu-Kristo, pe ozingami na bambwa oyo bakengelaka, ozali na tina te ya kobanga monguna oyo azali kobaluka baluka lokola nkosi oyo azali koganga. Kobanga te, ndima kaka !* ».

Na makambo lolenge na lolenge, topambolamaki mingi na nzela ya boleki oyo ya ntoma-mokonzi. Nasangani elongo na bantoma na biso banso pona kolakisa na bino botondi na ngai ya solo solo, bosepeli ya mozindo pona bondimi na bino, pe limemya esantu pona bomikabi na bino oyo ekoki kotangama te – na lolenge nyonso, mosika to pene – pona elonga tozuaki na mobembo ya ntoma-mokonzi epa na biso.

Kasi soki totaleli yango malamumu malamumu, yambo ya nyonso ezali epai na Nzambe nde esengeli kopesa matondi, kosepela na biso pe limemya na biso. Ya solo, tango bamoko pe basusu bapesaki likabo na bango, ezalaki Nzambe nde apesaki posa pe kosala (Ba-Filipien 2 : 13); tango moko alonaki pe mosusu asopaki mai, ezalaki Nzambe nde akolisaki yango ( 1 Ba-Korentien 3 : 6 ); ata tango bokasi na biso ya bomoto pe tekini emonanaki ete esuki, Nzambe atikalaki na nguya na bolembu na biso (2 Ba-Korentien 12 : 9). Nkembo nyonso ezala epai na Ye ! Tozali na libaku ya kolakisa botondi oyo na nzela ya likabo na biso ya botondi na mokolo ya lomingo, le 4 octobre, na ba masanga na biso.

Boleki ya Ntoma-mokonzi ezalaki nde lipamboli bobele moko ? Oh, te te !

- Na bomoyi oyo tobikaka, elaka ya Nzambe elongaki : «...*boloni pe bobuki mbuma, malili pe molunge, eleko ya molunge pe ya malili, butu pe moyi* » etikali kosila te (Ebandeli 8 : 22). Nzambe apesi biso lipa, kolongono ya nzoto, makasi, libota, baninga, elonga, pe makambo mingi lisusu. Totonda Ye botondi !
- Na eteni ya molimo, Nzambe apesi biso NYONSO na nzela ya Mwana na ye : boponami yambo mokili ekelama, bosantisami, boyambami lokola bana, bwanya, mayele, boyebi libombami ya kolinga na ye, bolimbisi ya masumu na biso, eteni oyo tozui na nzela ya Molimo-Mosantu (Ba-Efezien 1 : 3-13), pe elaka ya libula ya bomoi ya seko (Yoane 3 : 16). Topesa Ye matondo !
- Ee, kasi toloba boni po na esika oyo mabondeli na biso eyanolami te ? Ata wana pe, topesa Ye matondo yambo tozua, po ete Ye azali Nzambe oyo apesaka (Ebandeli 22 : 8, 14 ; Ba-Filipien 4 : 19 ). Topesa Ye na esengo pe na elikia !
- Ata tango nazali na kati ya mimekano? Ee, ata na tango wana tozotonda Ye po ete, na mimekano, Ye apesaka makoki ya kobima kati na yango (1 Ba-Korentien 10 : 13). Lolenge moko na Polo na Silas na boloko (Misala 16 : 25), tosambela pe toyemba masanzoli na Ye !

Na bomoko na bantoma na biso banso, nazali kotombela bino feti ya Botondi botondi epambolami pe kimia na masanga pe mabota na biso nyonso.

Elie-Tatien MUKINDA

Ntoma ya disitiliki